

## Միջ -Համայնքային Տոնակատարություն` Վարդանանց Տոնակատարություն

*Խորհուրդ Վարդանանց:*

*Խորհուրդ` ազգի, լեզուի եւ հաւատի: Խորհուրդ` յանդգնութեան, գոյապայքարի, հերոսութեան ու հաւատարմութեան:*

*Եւ ահա, 1562 տարիներ ետք, հայ ժողովուրդը կրկին կը տօնէ սոյն սրբազան խորհուրդն ու ուխտը, իր գոյութեան մէջ վերանորոգելով Վարդանանց ճակատամարտի վեհ գաղափարը:*

*Առ այդ, Հայ երեք Համայնքապետերու հովանաւորութիամբ եւ Սուրիոյ Հայ Աւետարանական Համայնքի կազմակերպութեամբ, կիրակի 3 Փետրուար 2013-ին, կէսօրուան ժամը 12:30-ին, Հալէպահայ գաղութը համախմբուեցաւ Հայ Աւետարանական Բեթել եկեղեցւոյ մէջ նշելու հայ ժողովուրդի պատմութեան հերոսական էջերէն մին` Վարդանանց տօնը:*

*Տօնախմբութեան իրենց ներկայութիւնը բերին` հոգեւոր հովիւներ, բարեսիրական հաստատութիւններու եւ միութիւններու ներկայացուցիչներ, պատուական ազգայիններ, ինչպէս նաեւ հաւատացեալ ու հայրենասէր հանրութիւն:*





*Վերապատուելի Սերոբ Մկրտիչեան ողջունեց Հայ երեք Համայնքապետերը: Ապա գաղութիս երեք համայնքապետերը յաջորդաբար հանդէս եկան, փոխանցելու իրենց սրտի խօսքը:*

*Գեղարուեստական յայտագրով պարբերաբար իրենց մասնակցութիւնը բերին մեներգով՝ տիկ. Բալիկ Գալէմբերեան-Բօբօլա, դաշնամուրի ընկերակցութեամբ՝ տիկ. Շողոկաթ Աբարդեան-Սելիմեանի: Մեղմահունչ, սակայն թնթացնող կատարողութեամբ հնչեցին «Լոեց Ամպերը», «Պլպուլն Աւարայրի» եւ «Խորհուրդ Վարդանանց» (Խօսք եւ երաժշտութիւն՝ Վեր. Պարգեւ Աբարդեանի) երգերը, երաժշտական մշակմամբ՝ տիկ. Շողակաթ Աբարդեան-Սելիմեանի:*



Արհիպապատիւ Տէր Պետրոս Արք. Միրիաթեան սրտի խօսքով հանդէս եկաւ, լուսարձակի տակ առնելով քրիստոնէականութեան սկզբունքային իրականութիւնը, թէ՛ «Քրիստոսի համար միջին ճամբայ չկայ, երկու Տիրոջ չենք կրնար ծառայել, կամ Աստուծոյ եւ կամ սատանային», ապա շարունակեց. «Երկրնտրանք չկայ, ասոր համար քրիստոնէային կեանքը դժուար է, ընտրութիւն կը պահանջէ յստակ դիրքորոշում, որ միեւնոյն պարագային մէջ գտնուեցան Վարդան եւ իր ընկերները 451 թուականին»:

Վերապատուելի Համայնքապետ Յարութիւն Սելիմեան նախ բնութագրեց Վարդանանց ճակատամարտը, որպէս հերոսամարտ եւ հաւատամարտ, որոնք իրարու հետ առնչուած իրականութիւններ են, որովհետեւ՝ Վարդանանց հերոսամարտը ունէր ամբողջական նշանակութիւն՝ քրիստոնէական հաւատքի ինքնապաշտպանութիւն, հայրենիքի իշխանութիւնն ու պետականութիւնը վերադարձնելու եւ հողին կառչելու սկզբունքային կողմնորոշում: Ապա Վերապատուելի Համայնքապետը հրաւիրեց Վարդանի խորհուրդով, հայ ժողովուրդին համար միանալու, լիցքաւորուելու ու համախմբուելու ճշմարիտ եւ իսկական Տէր Յիսուսի անձին մէջ: Ան իր խօսքի աւարտին որպէս առաջնորդ եւ ղեկավար ազգային ու հայրենասիրական հոգիները բոցավառելու ցանկութեամբ յայտնեց, թէ. «Մենք պիտի փորձենք գալիք սերունդներուն երաշխաւորութիւն փոխանցել, թէ՛ հայ ժողովուրդը պիտի մնայ անսասան, պիտի մնայ անդրդուելի, պիտի մնայ անյաղթ իր ունեցած ազգային ու եկեղեցական սկզբունքներուն ու հաւատքին բերումով»:



Գերաշնորհ՝ Տէր Շահան Եպս. Սարգիսեան նախ անդրադարձաւ պատմական այն իրողութեան, թէ այդ օրերուն, ինչպէս. «Համախմբուեցան ընտիր հայկազունք եւ արի հաւատացեալք կնքեցին Աստուծոյ հետ իրենց հայրենիքին եւ ժողովուրդին յաղթանակը»: Ան շարունակեց իր մտահոգութիւնը կիսելով. «Ինչպիսի՞ն կատարել, որ մենք հաւատարիմ մնանք Քրիստոսին, հաւատարիմ մնանք անցեալին, ներկային եւ մանաւանդ գալիքին: Այս պատգամն է, որ մեզ կը համախմբէ Սրբոց Վարդանանց յիշատակը»: Ապա մատնացոյց ընելով բոլոր ծանօթ ընկալեալ երեք ժամանակները անցեալը, ներկան եւ ապագան ըսաւ, թէ. «Ոչ մէկ արժէք կը ներկայացնեն անցեալի բոլոր նիւթական, հոգեւոր, ընկերային եւ քրիստոնէական արժանիքները, եթէ անոնք յիշատակիչ նշանակութիւն չունենան ներկային եւ դաստիարակիչ դեր ապագային, ինչպէս՝ Վարդանանց ճակատամարտն է»:

Վարդանանց կիրակնօրեայ տօնահանդէսը իր լրումին հասաւ Հայ Երեք Համայնքապետերու առաքելական օրհնութեան աղօթքով:



Տիկ. Ազնիւ Ստեփանեան-Արապաճեան